

1. Digitalna transformacija KS

Aktivnosti Ministarstva pravde i uprave vezane za digitalnu transformaciju Kantona Sarajevo se trenutno fokusiraju na 2 polja djelovanja – stvaranje pravnog okvira za pružanje usluga kantonalnih organa uprave digitalnim putem, te razvoj ITK rješenja za pružanje tih usluga.

U pogledu zakonodavnog okvira je Ministarstvo pripremilo prednacrt Zakona o elektronskom upravljanju u KS i provelo konsultacije u trajanju od 30 dana sa svim kantonalnim organima uprave, jedinicama lokalne samouprave, zainteresovanim federalnim i državnim organima i organizacijama, kao i drugim zainteresovanim organizacijama i udruženjima. Nakon analize rezultata konsultacija i uvažavanja dijela dostavljenih primjedbi i sugestija, Ministarstvo je izradilo Nacrt ovog Zakona i uputilo ga Vladi KS, koja je utvrdila Nacrt zakona o elektronskom upravljanju na sjednici održanoj 22.02.2024. godine i uputila ga dalje u skupštinsku proceduru.

Bit ovog zakona predstavlja osiguranje tehničkih i drugih uslova za korištenje jedinstvenog informacionog sistema, uslova interoperabilnosti, portabilnosti i responzivnosti, te s tim u vezi, uspostavljanje ePortala Kantona Sarajevo i definisanje načina njegovog funkcionisanja i korištenja, predstavlja, s obzirom da su pitanja koja predstavljaju osnov za elektronsku komunikaciju organa javnog sektora sa građanima i međusobnu komunikaciju između organa javnog sektora elektronskim putem već regulisana propisima federalnog, odnosno državnog nivoa vlasti.

U pogledu drugog aspekta, razvoj tzv. e-Portala, centralnog upravnog mjesta za pružanje digitalnih usluga građanima KS je u završnoj fazi. Na samoj izradi rješenja je bio angažiran UNDP kao partner Vlade i trenutno se radi preuzimanje ovog Sistema od strane Zavoda za informatiku i statistiku i njegovo testiranje.

Za adekvatnu primopredaju i testiranje e Portala je, u prelaznom periodu, a do usvajanja Zakona o elektronskom upravljanju, Vlada KS je 11.01.2024. godine je formirala Radno tijelo koje čine predstavnici Ministarstva pravde i uprave, Zavoda za informatiku i statistiku i vanjskih saradnika, stručnjaka u oblasti digitalizacije. Radno tijelo, između ostalog ima zadatak i da izradi kriterije i na temelju tih kriterija identificira i vladi predloži setove usluga koje će se digitalizirati i dinamiku digitaliziranja tih usluga po fazama.

MPU radi i na otklanjanju nedostataka pravnog okvira pokretanjem inicijativa gdje je potrebno za funkcionisanje e-Portala (Zakon o administrativnim taksama KS). U smislu pristupačnosti e-Portala MPU je vodilo računa i o inkluzivnom rješenju slijepih osoba.

2. Donošenje zakona o lokalnoj samoupravi

Na 14. sjednici Vlade Kantona Sarajevo, održanoj 22.06.2023. godine, Vlada KS je prihvatila Informaciju Ministarstva o poduzetim aktivnostima na izradi Amandmana na Ustav Kantona Sarajevo i Zakona o lokalnoj samoupravi, kao dvjema povezanim i uzajamno povezanim aktivnostima.

Iako je Ministarstvo pravde i uprave u nekoliko mandata uzastopno radilo na donošenju ovog Zakona, radne grupe koje su višekratno formirane i koje su okupljale predstavnike Kantona, svih općina na području Kantona, Grada Sarajeva i Saveza općina i gradova, nisu postigle konsenzus u pogledu sadržaja ovog Zakona, a ministarstvo ne može izraditi tekst Zakona koji nema podršku općina i Grada. Primarno se radi o pitanju nadležnosti, ali i nekoliko drugih spornih pitanja.

Zaključkom sa navedene sjednice predloženo Skupštini Kantona Sarajevo da održi tematsku sjednicu na kojoj će se razmatrati pitanje aktivnosti izrade Amandmana na Ustav Kantona Sarajevo i Zakona o lokalnoj samoupravi, te zaduženo Ministarstvo da održi sastanak sa predstavnicima jedinica lokalne samouprave na temu izrade Zakona o lokalnoj samoupravi u Kantonu Sarajevo. Postupajući po predmetnom Zaključku dana 23.08.2023. godine Ministrica pravde i uprave održala je sastanak sa predstavnicima jedinica lokalne samouprave. Vlada Kantona Sarajevo na 25. sjednici održanoj 07.09.2023. godine primila na znanje Informaciju Ministarstva o poduzetim aktivnostima shodno Zaključku od 22.06.2023. godine. S obzirom da smo u godini u kojoj se održavaju lokalni izbori, Ministarstvo je predvidjelo izradu ovih propisa za posljednji kvartal tekuće godine.

3. Grantovi za obrazovni program na TVSA

U Budžetu Kantona Sarajevo 2023. Godine za Subvencije javnim preduzećima - JP Televizija Kantona Sarajevo odobren je iznos od 4.300.000,00 KM, koji je u jednakim mjesečnim transferima isplaćen JP Televiziji Kantona Sarajevo. Ukupni iznos subvencije se odnosi na subvencioniranje troškova poslovanja TVSA, nabavku gotovog programa i proizvodnju vlastitog, koji je u Budžetu predstavljen u jednoj stavci.

Za Nabavku gotovog programa i proizvodnju vlastitog programa planiran je ukupan iznos od 350.000,00 KM i to za:

1. **nabavku gotovog programa** iz Budžeta 2023. planirano je 200.000,00 KM, a još dodatnih 130.000,00 KM (Zaključak Vlade broj: 02-04-51760-3.4/22 od 31.12.2022. - 400.000,00 KM),
2. **proizvodnju vlastitog programa** planirana su sredstva u iznosu od 20.000,00 KM.

Ministarstvo pravde i uprave nema nikakvog uticaja na kreiranje programa TVSA. Pojedinačna ministarstva naravno mogu ostvariti određenu saradnju u vidu kreiranja programskih sadržaja iz njihovih resora, ali ovo pitanje treba postaviti ili TVSA ili resornom ministarstvu, jer Ministarstvo pravde i uprave KS ne raspolaže ovim informacijama. Obaveza Ministarstva se iscrpljuje navedenim transferom mjesečnim transferima prema TVSA.

4. Revidiranje normative kojom se uređuje programiranje i izvještavanje u javnom sektoru, u cilju osiguranja funkcionalnog i efikasnog upravljanja kadrovima

Prema prijedlogu MPU, Vlada Kantona Sarajevo donijela je Odluku o usvajanju Politike upravljanja ljudskim resursima u državnoj službi Kantona Sarajevo na 97. sjednici održanoj 13.10.2022. godine. Nastavno na to MPU je predložilo i Odluku o usvajanju Strategije za razvoj ljudskih resursa u strukturama državne službe Federacije Bosne i Hercegovine, a koju je Vlada Kantona Sarajevo usvojila na 15. sjednici održanoj 06.07.2023. godine. U sklopu ovih aktivnosti Ministarstvo je dalje učestvovalo u izradi Akcionog plana za provođenje navedene strategije. U sklopu provedbe Akcionog plana planirana je izrada Kadrovskih planova za institucije u cilju osiguranja funkcionalnog i efikasnog upravljanja kadrovima.

U ovom kontekstu treba reći i da je Plan kadrova element sadržaja svih programa rada kako je propisano Odlukom o metodologiji izrade i donošenja programa rada i izvještaja o radu Vlade Kantona Sarajevo i kantonalnih organa (Sl. nov. KS, br. 1/23-Prečišćeni tekst). Plan kadrova obuhvata utvrđivanje potrebnih kadrova neophodnih za realizaciju ciljeva i rad organa javnog sektora, po broju, kvalifikacionoj strukturi i pozicijama na koje se postavljaju. U rad interresorne Radne grupe za izmjene relevantnih akata i unaprjeđenje formata i sadržaja programa rada i izvještaja o radu institucija i uvezivanje sa budžetiranjem i strateškim pravcima djelovanja koju je imenovala Vlada Kantona Sarajevo (*Rješenjem broj: 02-04-50535-61.1/22 od 22.12.2022. godine, izmijenjenim Rješenjem broj: 02-04-4931-11/23 od 23.02.2023. godine, Rješenjem broj: 02-04-15280-30/23 od 27.04.2023. godine i Rješenjem broj: 02-04-33336-33.1/23 od 20.07.2023. godine*) bili su uključeni i predstavnici Ministarstva. Zadatak Radne grupe bio je da sačini Radni materijal i pripremi prijedlog Odluke o metodologiji izrade i donošenja planova rada i izvještaja o radu Vlade Kantona Sarajevo i kantonalnih organa koji će biti usaglašen sa Uredbom o trogodišnjem i godišnjem planiranju rada, monitoringu i izvještavanju u Federaciji BiH. Imajući u vidu sadržaj predloženih izmjena radi usaglašavanja sa federalnim propisima, nakon razmatranja Izvještaja o radu Radne grupe, VKS je kao nosioca izrade odredila Zavod za planiranje razvoja.

5. Provođenje uredbe o postupku objavljivanja propisa

Ovo spada u redovne aktivnosti Ministarstva. Transparentnost je ostao jedan od glavnih prioriteta Ministarstva pravde i uprave te se aktivnosti na činjenu dostupnim javnosti svih vrsta podataka i procesa od interesa za javnost, kao i onih koji mogu imati određeni koruptivni potencijal, provode u kontinuitetu u saradnji sa Uredom za borbu protiv Korupcije. U kontekstu Uredbe o postupku objavljivanja propisa je tokom prošle godine bilo nekoliko inicijativa za izmjene i dopune, ali su aktivnosti Ministarstva pravde i uprave trenutno vezane za Rješenje Agencije za zaštitu ličnih podataka od 18.3.2024. kojim se zabranjuje objavljivanje određenih vrsta akata, a što za sobom povlači potrebu za izmjenama i dopunama navedene Uredbe.

6. Pitanje koje se odnosi na transformaciju Kantona Sarajevo je neposredno vezano za pitanje Ustavnih amandmana i zakon o lokalnoj samoupravi i pretpostavlja postizanje političkog konsenzusa u pogledu podjele nadležnosti, položaja Grada i drugih pitanja

oko kojih dosad nije postignuta saglasnost. Sve što je rečeno u pod 2. stoga vrijedi i za ovo pitanje.

7. Unapređenje sistema edukacija i ocjenjivanja zaposlenih u javnom sektoru

Kao unapređenje sistema ocjenjivanja za Kanton Sarajevo i /grad, 25.01.2024. godine je održan sastanak na temu primjene Pravilnika o ocjenjivanju za organe državne službe u KS. Pravni okvir koji važi za ocjenjivanje u KS je harmoniziran sa onim koji važi na nivou FBiH i BiH. Vlada Kantona je kroz kolektivni ugovor sa državnim službenicima uvela svojevrsnu stimulaciju za državne službenike i namještenike ocijenjene najvišim ocjenama, propisujući određeni procenat dodata na platu (5% za najuspješnije i 3% za uspješne).

Što se tiče sistema edukacija, za provođenje obuka u KS zadužena je Agencija za državnu službu FBiH u skladu sa iskazanim potrebama organa državne službe u KS.

Propisi kojima je uređena navedena oblast u navedenom periodu nisu revidirani, niti je navedeno planirano u programu rada Ministarstva.